

摛藻堂四庫全書薈要

史部

欽定四庫全書叢要

史部

宋史卷二十一至二十四



詳校官編修臣王天祿

欽定四庫全書

史部

薈要卷五千六百四十九

宋史卷二十一

元中書右丞相總裁托克托等修

紀第二十一

徽宗三

二年春正月甲子制上書邪等人並不除監司二月戊子朔蔡京復太師致仕賜第京師庚子以婉容崔氏爲賢妃三月戊午朔定國公拱薨己巳御集英殿策進士

己卯賜禮部奏名進士及第出身七百十三人夏四月  
己丑詔縣令以十二事勸農於境內躬行阡陌督勤  
惰辛卯復行方田日中有黑子甲午宴蔡京等于太清  
樓乙巳以定國軍節度使仲忽爲開府儀同三司庚戌  
以何執中爲司空壬子賜張商英自便五月癸亥慮囚  
丁卯封子椿爲慶國公己巳蔡京落致仕三日一至都  
堂議事六月己丑以資政殿學士余深爲門下侍郎乙  
卯白虹貫日秋七月壬申訪天下遺書丙子置禮制局

九月壬午改太尉以冠武階癸未正三公三孤官改侍中爲左輔中書令爲右弼左右僕射爲太宰少宰罷尚書令冬十月乙巳得玉圭於民間十一月己未置知客省引進四方館東西上閣門事戊寅日南至受元圭于大慶殿赦天下辛巳蔡京進封魯國公以何執中爲少傅太宰兼門下侍郎執政皆進秩十二月甲申行給地牧馬法乙酉以鄭居中爲特進丙戌以武信軍節度使童貫爲太尉乙巳定命婦名爲九等丙午燕輔臣于延

福宮辛亥封子楨爲衛國公是歲成都府蘇州火出宮女三百八十三人高麗入貢成都路夷人董舜咨董彥博內附置祺亨二州

三年春正月己未以定王桓嘉王楷並爲太保庚申以廣平郡王構爲檢校太保甲子詔以天賜元圭遣官冊告永裕永泰陵丙寅以燕王俛爲太傅癸酉追封王安石爲舒王子雱爲臨川伯配饗文宣王廟丁丑吳居厚罷以觀文殿學士鄭居中知樞密院事己卯以越王偲

爲太傅封子撻爲韓國公二月甲申以德妃王氏爲淑  
妃庚寅罷文臣勲官辛卯崇恩太后暴崩甲午以遼女  
真相持詔河北沿邊防丁酉詔百官奉祠祿者並以三  
年爲任乙巳增定六朝勲臣一百一十六人三月壬子  
朔日有食之戊辰進神宗淑妃宋氏爲貴妃升永安縣  
爲永安軍癸酉賜上舍生十九人及第夏四月戊子作  
保和殿庚寅以復濤播等州降德音于梓夔路癸巳鄧  
洵仁罷乙巳以福寧殿東建玉清和陽宮丙午升定州

爲中山府己酉以資政殿學士薛昂爲尚書右丞庚戌  
班五禮新儀閏月丙辰改公主爲帝姬戊午復置醫學  
辛酉上崇恩太后謚曰昭懷庚午慶國公椿薨五月乙  
酉慮囚丙申升蘇州爲平江府庚子大盈倉火壬寅以  
築塗播進執政官一等丙午葬昭懷皇后于永泰陵丁  
未詔尚書內省分六司以掌外省六曹所上之事置內  
宰副宰內史治中等官及都事以下吏員己酉班新燕  
樂六月癸亥祔昭懷皇后神主于太廟戊辰降兩京河

陽鄭州囚罪一等民緣園陵役者蠲其賦秋七月癸未  
升趙城縣爲慶祚軍甲申還王珪孫固贈謚追復韓忠  
彥曾布安燾李清臣黃履等官職庚子貴妃劉氏薨壬  
寅復置白州八月甲戌以燕樂成進執政官一等丙子  
以何執中爲少師丁丑升潤州爲鎮江府戊寅封四鎮  
山爲王九月庚寅詔大理寺開封府不得奏獄空其推  
恩支賜並罷戊戌追冊貴妃劉氏爲皇后謚曰明達冬  
十月乙丑閱新樂器于崇政殿出古器以示百官戊辰

詔冬祀大禮及朝景靈宮並以道士百人執威儀前導  
冬十一月辛巳朝獻景靈宮壬午饗太廟加上神宗謚  
曰體元顯道法古立憲帝德王功英文烈武欽仁聖孝  
皇帝改上哲宗謚曰憲元繼道世德揚功欽文睿武齊  
聖昭孝皇帝癸未祀昊天上帝于圜丘大赦天下升端  
州爲興慶府乙酉以天神降詔告在位作天真降臨示  
現記己丑以賢妃崔氏爲德妃壬辰築祥州己亥詔有  
官人許舉八行十二月癸丑詔天下訪求道教仙經乙

卯詔天下貢醫士辛酉太白晝見是歲江東旱溫封滋  
三州火出宮女二百七十有九人

四年春正月戊寅朔置道階凡二十六等辛丑追封濮  
王子宗誼爲祁王宗詠爲萊王宗師爲溫王宗輔爲楚  
王宗博爲蕭王宗沔爲霍王宗蓋爲建王宗勝爲袁王  
二月丁巳賜上舍生十七人及第癸亥改清井監爲長  
寧軍癸酉長子桓冠三月丙子朔以淑妃王氏爲貴妃  
夏四月庚戌幸尚書省以手詔訓誠蔡京何執中各官

遷秩吏賜帛有差癸丑閱太學辟雍諸生雅樂甲子改  
戎州爲敘州五月丙戌始祭地于方澤以太祖配降德  
音于天下子機薨六月戊午慮囚壬申以廣西溪洞地  
置隆兌二州秋七月丁丑置保壽粹和館以養宮人有  
疾者戊寅焚苑東門所儲毒藥可以殺人者仍禁勿得  
復貢甲午祔明達皇后神主于別廟八月乙巳改端明  
殿學士爲延康殿學士樞密直學士爲述古殿直學士  
癸亥定武臣橫班以五十員爲額九月己卯以安靜軍

節度使王憲爲開府儀同三司己亥詔諸路兵應役京  
師者並以十月朔遣歸冬十月乙巳復置拱州十一月  
丁丑封子挺爲相國公十二月己酉以禁中神御殿成  
減天下囚罪一等癸丑定朝儀奉直大夫以八十員爲  
額己未詔廣南市舶司歲貢真珠犀角象齒是歲相州  
野蠶成繭出官女六十八人

五年春正月庚辰瀘南晏州夷反尋詔梓州路轉運使  
趙遹等督兵討平之己丑令諸州縣置醫學立貢額甲

午改龍州爲政州二月乙巳立定王桓爲皇太子甲寅冊皇太子赦天下庚午以童貫領六路邊事三月辛未朔太白晝見己卯御集英殿策進士甲申追論至和嘉祐定策功封韓琦爲魏郡王復文彥博官丁亥詔以立皇太子見責降文武臣僚並與牽復甄敘凡千五百人壬辰升舒州爲德慶軍癸巳賜禮部奏名進士出身六百七十人夏四月甲辰作葆真宮丁未詣景靈宮還幸祕書省進館職官一等庚戌收集英殿爲右文殿癸亥

置宣和殿學士詔東宮講讀官罷讀史五月壬辰慮囚  
六月癸丑以修三山河橋降德音于河北京東京西路  
秋七月戊辰朔日有食之乙亥升汝州爲陸海軍丁丑  
詔建明堂于寢殿之南甲申昭慶軍節度使蔡卞爲開  
府儀同三司丁亥封子樾爲瀛國公八月己酉以祕書  
省地爲明堂辛亥升通利軍爲濬州平川軍節度嗣濮  
王仲增薨九月己卯封仲御爲嗣濮王丙戌封子樞爲  
惠國公冬十月癸卯以嵩山道人王仔昔爲沖隱處士

戊午夏國入貢十一月癸酉錄昭憲皇后杜氏之裔庚寅高麗遣子弟入學十二月己亥升遂州爲遂寧府庚申以平晏夷曲赦四川癸亥置緣邊安撫司于瀘州是歲平江府常湖秀州水出宮女五十人

六年春正月戊子以瀘南獻捷轉宰執一官以童貫宣撫陝西河北閏月壬寅升潁州爲順昌府丁未置道學二月丁亥詔增廣天下學舍庚寅詔廣京城三月癸丑賜上舍生十一人及第夏四月乙丑會道士于上清寶

錄官卒未以何執中爲太傅致仕朝朔望丁丑詔天寧  
諸節及壬戌日杖已下罪聽贖丙戌卻監司守臣進獻  
庚寅詔蔡京三日一朝正公相位總治三省事五月丁  
酉廢錫錢庚子以鄭居中爲少保太宰兼門下侍郎劉  
正夫爲特進少宰兼中書侍郎壬寅以保大軍節度使  
鄧洵武知樞密院事六月丙寅班中書官制格庚午慮  
囚甲戌詔堂吏遷官至奉直大夫止癸未皇太子納妃  
朱氏秋七月壬辰朔以震武城爲震武軍甲午以德妃

崔氏爲貴妃辛亥以河陽三城節度使王薦爲開府儀同三司諸盜晏州卜漏闕一沅州黃安俊定邊軍李叱哆

字漏

伏誅詔函首于甲庫壬子曲赦湖北己未解池生紅鹽辛酉改走馬承受公事爲廉訪使者八月壬戌朔戒北邊帥臣母生事壬午詔天下監司郡守搜訪巖谷之士雖恢詭譎怪自晦者悉以名聞丁亥辛卯京第己丑升晉州爲平陽壽州爲壽春齊州爲濟南府九月辛卯朔詣玉清和陽宮上太上開天執符御歷含真體道昊天

玉皇上帝徽號寶冊丙申赦天下令洞天福地脩建宮  
觀塑造聖像以西內成曲赦京西己未以童貫爲開府  
儀同三司冬十月乙丑太白晝見十一月丁酉朝獻景  
靈宮戊戌饗太廟己亥祀昊天上帝于圜丘赦天下庚  
子以禮部尚書白時中爲尚書右丞辛丑魏公材薨戊  
申以侯蒙爲中書侍郎薛昂爲尚書左丞己未徙封衛  
國公樞爲鄆國公增橫班爲十三階十二月己巳以婉  
儀劉氏爲賢妃戊寅以熙河進築功成進執政一官乙

酉奠九鼎于圓像徽調閣劉正夫爲開府儀同三司致仕戊子以宗粹爲開府儀同三司是歲冀州三山黃河清出宮女六百人高麗占城大食真臘大理夏國入貢茂州夷王永壽內附

七年春正月丁酉于闈入貢庚子以殿前都指揮使高岱爲太尉二月癸亥以大理國主段和譽爲雲南節度使大理國王甲子會道士二千餘人于上清寶錄宮詔通真先生林靈素諭以帝君降臨事丁卯御集英殿策

高麗進士辛未改天寧萬壽觀爲神霄玉清萬壽宮乙亥幸上清寶錄宮命林靈素講道經三月庚寅賜高麗祭器高麗進士權適等四人賜上舍及第乙未以童貫權領樞密院丙申升鼎州爲常德軍夏四月庚申帝諷道錄院上章冊己爲教主道君皇帝止於教門章疏內用辛酉升溫州爲應道軍五月戊子朔升慶州爲慶陽軍渭州爲平涼軍己丑如玉清和陽宮上承天效法厚德光大后土皇地祇徵號寶冊辛卯命蔡攸提舉秘書

省并左右街道錄院乙未詔權罷宮室修造辛丑祭地  
于方澤降德音于諸路以監司州縣共爲姦贓令廉訪  
使者察奏仍許民徑赴尚書省陳訴癸卯改玉清和陽  
宮爲玉清神霄宮六月戊午朔以明堂成進封蔡京爲  
陳魯國公戊辰以嘉王楷爲太傅改節度觀察留後爲  
承宣使己巳蔡京辭兩國不拜詔官其親屬二人壬午  
詔禁巫覡丙戌貴妃宋氏薨秋七月壬辰熙河環慶涇  
原地震庚子詔八寶增定命寶八月癸亥詔明堂并祠

五帝鄭居中以母憂去位九月戊子詔湖北民力未舒  
胡耳西道可罷進築辛卯大饗明堂赦天下乙未劉正  
夫卒丁酉西蕃王子益麻党征降見于紫宸殿壬寅進  
宰執官一等甲辰以薛昂爲特進癸丑貴妃王氏薨冬  
十月乙卯朔初御明堂班朔布政戊寅侯蒙罷十一月  
庚寅命蔡京五日一赴都堂治事辛卯鄭居中起復以  
余深爲特進少宰兼中書侍郎白時中爲中書侍郎壬  
辰復置醴州丙申何執中卒升石泉縣爲軍十二月戊

申朔有星如月丁巳以薛昂爲門下侍郎戊辰詔天神  
降于坤寧殿刻石以紀之庚午以童貫領樞密院命戶  
部侍郎孟揆作萬歲山是歲三山河水清出宮女六十  
八人

重和元年春正月甲申朔受定命寶于大慶殿戊子封  
孫謐爲崇國公己丑赦天下應元符末上書邪中等人  
依無過人例乙巳封姪有奕爲和義郡王庚戌以翰林  
學士承旨王黼爲尚書左丞三月戊辰增諸路酒價庚

子遣武義大夫馬政由海道使女真約夾攻遼甲戌升  
六安縣爲六安軍丁丑詔監司輒以禁錢買物爲苞苴  
饋獻諭以大不恭三月丙戌詔監司郡守自今須滿三  
歲乃得代仍毋得通理癸巳令嘉王楷赴廷對丙申以  
茂州蕃族平曲赦四川丁酉知建昌陳并等改建神霄  
宮不虔及科決道士詔並勒停戊戌御集英殿策進士  
戊申賜禮部奏名進士及第出身七百八十三人有司  
以嘉王楷第一帝不欲楷先多士遂以王昂爲榜首夏

四月癸丑朔築靖夏城制戎城錄呂餘慶後癸亥減捶  
刑己卯詔每歲以季秋親祀明堂如孟月朝獻禮以太  
上混元上德皇帝二月十五日生辰爲貞元節五月壬  
午朔日有食之乙酉詔諸路選漕臣一員提舉本路神  
霄宮丁亥以林靈素爲通真達靈元妙先生張虛白爲  
通元沖妙先生壬辰班御製聖濟經以青華帝君八月  
九日生辰爲元成節庚戌手敕兩浙漕司以權添酒錢  
盡給御前工作六月乙卯以賢妃劉氏爲淑妃己巳以

淮西盜平曲赦庚子慮囚甲戌以西邊獻捷曲赦陝西  
河東路秋七月壬午以西師有功加蔡京恩官其一子  
鄭居中爲少傅余深爲少保鄧洵武爲特進進執政官  
一等己酉遣廉訪使者六人振濟東南諸路水災八月  
甲寅以童貫爲太保辛酉詔班御註道德經壬申詔執  
政非入謝及丐去母得獨留奏事癸酉封子椅爲嘉國  
公乙亥升兗州爲襲慶府九月辛巳大饗明堂壬午詔  
罷拘白地禁榷貨增方田稅添酒價取醋息河北加折

耗米東南水災強糴等事丙戌詔太學辟雍各置內經  
道德經莊子列子博士二員己丑以歲當戊月當壬爲  
元命降德音于天下庚寅薛昂罷以白時中爲門下侍  
郎王黼爲中書侍郎翰林學士承旨馮熙載爲尚書左  
丞刑部尚書范致虛爲尚書右丞壬辰禁州郡遏糴及  
邊將殺降以倅功賞者癸巳禁羣臣朋黨丁酉用蔡京  
言集古今道教事爲紀志賜名道史辛丑鄭居中罷乞  
持餘服詔從之詔察縣令治行諸路監司能改正州縣

事者較爲殿最詔視中大夫林靈素視中奉大夫張虛  
白並特授本品真官閏月庚申詔江淮荆浙閩廣監司  
督責州縣還集流民丁卯進封楷爲鄆王丙子詔周柴  
氏後已封崇義公復立恭帝後以爲宣義郎監周陵廟  
世世爲國三恪冬十月己卯朔太白晝見己亥改興慶  
軍爲肇慶府甲辰置道官二十六等道職八等十一月  
己酉朔改元大赦天下辛亥日中有黑子丙辰以婉容  
王氏爲賢妃辛酉補上書人安堯臣官已巳升梓州爲

潼川府十二月戊寅朔復京西錢監己丑置裕民局是歲江淮荆浙梓州水出宮女百七八人黃巖民妻一產四男子于闐高麗入貢

宋史卷二十一

欽定四庫全書

欽定四庫全書 著要卷五千六百五十

史部

宋史卷二十二

元中書右丞相總裁托克托等修

本紀第二十二

徽宗四

宣和元年春正月戊申朔日下有五色雲壬子進建安  
郡王樞爲肅王文安郡王杞爲景王並爲太保乙卯詔  
佛改號大覺金僊餘爲僊人大士僧爲德士易服飾稱

姓氏寺爲宮院爲觀改女冠爲女道尼爲女德丁巳金人使李善慶來遣趙有開報聘至登州而還戊午以余深爲太宰兼門下侍郎王黼爲特進少宰兼中書侍郎乙丑改湟州爲樂州癸酉封子棟爲溫國公姪有恭爲永寧郡王乙亥躬耕籍田罷裕民局二月庚辰改元易宣和殿爲保和殿戊戌以鄧洵武爲少保三月庚戌蔡京等進安州所得商六鼎己未以馮熙載爲中書侍郎范致虛爲尚書左丞翰林學士張邦昌爲尚書右丞詔

天下知官觀道士與監司郡縣官以客禮相見童貫遣  
知熙州劉法出師攻統安城夏人伏兵擊之法敗歿震  
武軍受圍甲子知登州宗澤坐建神霄宮不虔除名編  
管辛未賜上舍生五十四人及第甲戌皇后親蠶夏四  
月丙子朔日有食之庚寅童貫以鄜延環慶兵大破夏  
人平其三城己亥曲赦陝西河東路辛丑進輔臣官一  
等五月丙午朔有物如龍形見京師民家丁未詔德士  
並許入道學依道士法丙辰敗夏人于震武壬申班御

製九星二十八宿朝元冠服圖甲戌慮因是月大水犯  
都城西北有赤氣亘天六月壬午詔西邊武臣爲經畧  
使者改用文臣甲申詔封莊周爲微妙元通真君列禦  
寇爲致虛觀妙真君仍行冊命配享混元皇帝己亥夏  
國遣使納欵詔六路罷兵秋七月甲寅以童貫爲太傅  
八月戊寅詔諸路未方田處並令方量均定租課丁酉  
以神霄宮成降德音于天下范致虛以母憂去位九月  
甲辰朔燕蔡京於保和新殿辛酉大饗明堂癸亥幸道

德院觀金芝遂幸蔡京第丁卯以淮康軍節度使蔡攸  
爲開府儀同三司冬十月甲戌以紹述熙豐政事書布  
告天下十一月癸丑朝獻景靈宮甲寅饗太廟乙卯祀  
昊天上帝于圜丘赦天下甲子詔東南諸路水災令監  
司郡守悉心振救戊辰以淮甸旱饑民失業遣監察御  
史察訪張邦昌爲尚書左丞翰林學士王安中爲尚書  
右丞時朱勔以花石綱媚上東南騷動太學生鄧肅進  
詩諷諫詔放歸田里十二月甲戌詔京東東路盜賊竊

發令東西路提刑督捕之辛卯大雨雹丙申帝數微行  
正字曹輔上書極論之編管郴州是歲京西饑淮東大  
旱遣官賑濟嵐州黃河清升邢州爲信德陳州爲淮寧  
襄州爲襄陽慶州爲慶陽安州爲德安鄆州爲東平趙  
州爲慶元府瀘州爲瀘川睦州爲建德岳州爲岳陽寧  
州爲興寧宜州爲慶遠光州爲光山均州爲武當軍  
二年春正月癸亥追封蔡確爲汝南郡王甲子罷道學  
二月乙亥遣趙良嗣使金國唐恪罷庚辰以寧遠軍節

度使梁子美爲開府儀同三司戊子令所在贍給淮南流民諭還之甲午詔別修哲宗史三月壬寅賜上舍生二十一人及第乙卯改熙河蘭湟路爲熙河蘭廓路夏四月丙子詔江西廣東兩界羣盜嘯聚添置武臣提刑路分都監各一員五月庚子朔以淑妃劉氏爲貴妃己酉日中有黑子丁巳祭地于方澤降德音于諸路布衣朱夢說上書論宦寺權太重編管池州戊辰詔宗室有文行才術者令大宗正司以聞六月癸酉詔開封府賑

濟飢民丁丑太白晝見戊寅蔡京致仕仍朝朔望辛巳  
詔自今動改元豐法制論以大不恭丙戌詔三省樞密  
院額外吏職並從裁汰及有妄言惑衆稽違詔令者重  
論之詔諸司總轄提點之類非元豐法並罷丁亥復寺  
院額甲午罷禮制局并修書五十八所秋七月壬子罷  
文臣起復己未罷醫算學丙寅封子穗爲英國公八月  
庚辰詔減定醫官額乙未詔監司所舉守令非其人或  
廢法不舉令廉訪使者封之九月壬寅金人遣勃堇等

來乙巳復德士爲僧辛亥大饗明堂丙辰遣馬政使金國癸亥余深加少傅幸童貫第冬十月戊辰朔日有食之以河東節度使梁師成爲太尉建德軍清溪妖賊方臘反命譚稹討之十一月己亥余深罷仍少傅授鎮西軍節度使知福州庚戌以王黼爲少保太宰兼門下侍郎己未兩浙都監蔡遵顏坦擊方臘死之十二月丁亥改譚稹爲兩浙制置使以童貫爲江淮荆浙宣撫使討方臘己丑以少傅鄭居中權領樞密院庚寅詔訪兩浙

民疾苦是月方臘陷建德又陷歙州東南將郭師中戰死陷杭州知州趙震遁廉訪使者趙約詣賊死是歲淮南旱夏國真臘入貢

三年春正月壬寅鄧洵武卒戊午以安康郡王栩爲太保進封濟王鎮國公模爲開府儀同三司進封樂安郡王己未詔淮南江東福建各權添置武臣提刑一員辛酉罷蘇杭州造作局及御前納運乙丑罷西北兵更戍罷木石彩色等場務是月方臘陷婺州又陷衢州守臣

彭汝方死之二月庚午趙震坐棄杭州貶吉陽軍罷方  
田甲戌降詔招撫方臘乙酉罷天下三舍及宗學辟雍  
諸路提舉學事官癸巳赦天下是月方臘陷處州淮南  
盜宋江等犯淮陽軍遣將討捕又犯京東江北入楚海  
州界命知州張叔夜招降之三月丁未御集英殿策進  
士庚申賜禮部奏名進士及第出身六百三十人夏四  
月丙寅貴妃劉氏薨甲戌清溪令陳光以賊發縣內棄  
城伏誅庚寅忠州防禦使辛興宗擒方臘于清溪詔兩

浙江東被賊州縣給復三年癸巳汝州牛生麒麟五月  
戊戌以鄭居中領樞密院己亥詔杭越江寧守臣並帶  
安撫使甲辰追冊貴妃劉氏爲皇后諡曰明節改睦州  
建德軍爲嚴州遂安軍歙州爲徽州丙午金人再遣曷  
魯等來戊申以興寧軍節度使劉宗元爲開府儀同三  
司癸亥詔三省覺察臺諫罔上背公者取旨譴責陳過  
庭張汝霖以乞罷御前使喚及歲進花果爲王黼所劾  
並竄貶閏月丙寅減諸州曹掾官辛未立醫官額甲戌

復應奉司命王黼及內侍梁師成領之戊寅慮囚六月  
河決恩州清河埽秋七月丁卯振溫處等八州丁亥廢  
純滋等十二州戊子童貫等俘方臘以獻是月洛陽京  
畿訛言有黑眚如人或如犬夜出掠小兒食之二歲乃  
息八月甲辰曲赦兩浙江東福建淮南路乙巳以童貫  
爲太師譚稹加節度丁未祔明節皇后神主于別廟丙  
辰方臘伏誅九月丙寅以王黼爲少傅鄭居中爲少師  
庚午進執政官一等辛未大饗明堂冬十月甲寅詔自

今贓吏獄具論決勿貸童貫復領陝西兩河宣撫十一  
月丁丑馮熙載罷以張邦昌爲中書侍郎王安中爲尚  
書左丞翰林學士承旨李邦彥爲尚書右丞辛巳封子  
桐爲儀國公壬午張商英卒十二月辛卯朔日中有黑  
子壬子進封廣平郡王構爲康王樂安郡王模爲祁王  
並爲太保是歲諸路蝗

四年春正月丁卯以蔡攸爲少保梁師成爲開府儀同  
三司癸酉金人破遼中京遼主北走二月丙申以旱禱

于廣聖宮即日雨癸卯雨雹丙午以吳國公植爲開府  
儀同三司進封信都郡王三月辛酉幸祕書省遂幸太  
學賜祕書少監翁彥深王時雍國子祭酒韋壽隆司業  
權邦彥章服館職學官諸生恩錫有差丙子遼人立燕  
王淳爲帝金人來約夾攻命童貫爲河北河東路宣撫  
使屯兵于邊以應之且招諭幽燕夏四月丙午詔置補  
完校正文籍局錄三館書置宣和樓及太清樓祕閣又  
令郡縣訪遺書五月壬戌以高俅爲開府儀同三司丁

卯封子柄爲昌國公甲戌嗣濮王仲御薨乙亥以蔡攸  
爲河北河東宣撫副使庚辰以常德軍節度使譚稹爲  
太尉童貫至雄州令都統制种師道等分道進兵癸未  
遼人擊敗前軍統制楊可世于蘭溝甸乙酉封開府儀  
同三司江夏郡王仲爰爲嗣濮王丙戌慮囚楊可世與  
遼將蕭幹戰于白溝敗績丁亥辛興宗敗于范村六月  
己丑种師道退保雄州遼人追擊至城下帝聞兵敗懼  
甚遂詔班師壬寅以王黼爲少師是月遼燕王淳死蕭

幹等立其妻蕭氏。秋七月己未廢貴妃崔氏爲庶人壬午王黼以耶律淳死復命童貫蔡攸治兵以河陽三城節度使劉延慶爲都統制甲申种師道責授右衛將軍致仕和詵散官安置九月戊午朝散郎宋昭上書諫北伐王黼大惡之詔除名勒停廣南編管已未金人遣徒孤且烏歇等來議師期辛酉大饗明堂己巳高麗國王王悞薨遣路允廸弔祭甲戌遣趙良嗣報聘于金國己卯遼將郭藥師等以涿易二州來降冬十月庚寅改燕

京爲燕山府涿易八州並賜名癸巳劉延慶與郭藥師等統兵出雄州戊戌曲赦所復州縣己亥耶律淳妻蕭氏上表稱臣納款甲辰師次涿州己酉郭藥師與高世宣楊可世等襲燕蕭幹以兵入援戰于城中藥師等屢敗皆棄馬縋城而出死傷過半癸丑以蔡攸爲少傅判燕山府甲寅劉延慶自盧溝河燒營夜遁衆軍遂潰蕭幹追至涿水上乃還十一月丙辰朔行新璽戊辰朝獻景靈宮己巳饗太廟庚午祀昊天上帝于圜丘赦天下

東南官吏昨緣寇盜貶責者並次第移放上書邪上等  
人特與磨勘戊寅金人遣李靖等來許山前六州以彰  
德軍節度使鄭詳爲太尉十二月丁亥郭藥師敗蕭幹  
于永清縣戊子遣趙良嗣報聘于金國庚寅以郭藥師  
爲武泰軍節度使辛卯金人入燕蕭氏出奔壬辰使來  
獻捷乙未詔監司未經陞對母得之任丙申貶劉延慶  
爲率府率安置筠州壬寅進封植爲莘王

五年春正月戊午金人遣李靖來議所許六州代租錢

己未遣趙良嗣報聘求西京等州辛酉以王安中爲慶  
遠軍節度使河北河東燕山府路宣撫使知燕山府甲  
申錄富弼後二月乙酉朔以李邦彥爲尚書左丞翰林  
學士趙野爲尚書右丞丙戌金人以議未合斷橋梁焚  
次舍丁酉進封雍國公朴爲華原郡王徐國公棣爲高  
平郡王並爲開府儀同三司三月乙卯金人再遣阿固  
虫等來己未遣盧益報聘皆如其約夏四月癸巳金人  
遣楊璞以誓書及燕京涿易檀順景薊州來歸庚子童

貫蔡攸入燕時燕之職官富民金帛子女先爲金人盡掠而去乙巳童貫表奏撫定燕城庚戌曲赦河北東燕雲路是日班師五月己未以收復燕雲賜王黼玉帶庚申以王黼爲太傅鄭居中爲太保進宰執官二等辛酉王黼總治三省事癸亥童貫落節鉞進封徐豫國公蔡攸爲少師乙丑詔正位三公立本班帶節鉞若領他職者仍舊班著爲令癸酉祭地于方澤是月金人許朔武蔚三州金主阿固達殂弟烏奇邁立六月乙酉郭藥

師加檢校少傅丙戌遼人張覺以平州來附己丑仲爰  
薨乙未詔今後內外宗室並不稱姓丁酉以安國軍節  
度使仲理爲開府儀同三司進封嗣濮王己亥慮囚戊  
申鄭居中卒辛亥以蔡攸領樞密院秋七月戊午以梁  
師成爲少保己未童貫致仕起復譚稹爲河北河東燕  
山府路宣撫使庚午太傅楚國公王黼等上尊號曰繼  
天興道敷文成武睿明皇帝不允禁元祐學術八月辛  
巳朔日當食不見辛丑命王安中作復燕雲碑壬寅太

白晝見是月蕭幹破景州薊州寇掠燕山郭藥師敗之  
幹尋爲其下所殺傳首京師九月辛酉大饗明堂冬十  
月乙酉雨木冰壬寅罷諸路提舉常平之不職者十一  
月乙卯以鄭紳爲太師丙寅幸王黼第觀芝諸路漕臣  
坐上供錢物不足貶秩者二十二人丁卯王安中譚稹  
並加檢校少傅郭藥師爲太尉華原郡王朴薨壬申王  
黼子弟親屬推恩有差是月金人取平州張覺走燕山  
金人索之甚急命王安中縊殺函其首送之十一月乙

己金人遣高居慶等來賀正旦戊申以高平郡王棟爲太保進封徐王是歲秦鳳旱河北京東淮南饑遣官賑濟

六年春正月乙卯爲金主輓朝戊午置書藝所癸亥藏蕭幹首于太社戊寅遣連南夫弔祭金國二月丁亥以冀國公桺爲開府儀同三司進封河間郡王韶州防禦使令盪爲婺州觀察使封安定郡王己亥躬耕籍田丙午詔自今非歷臺閣寺監監司郡守開封府曹官者不

得爲郎官卿監著爲令李邦彥以父憂去位三月己酉  
朔以錢景臻爲少師金人來勾糧不與閏月辛巳皇后  
親蠶庚子御集英殿策進士夏四月癸丑賜禮部奏名  
進士及第出身八百五人丁巳李邦彥起復五月壬寅  
慮囚癸卯金人遣使來告嗣位六月壬子詔以收復燕  
雲以來京東兩河之民因於調度令京西淮浙江湖四  
川閩廣並納免夫錢期以兩月納足違者從軍法秋七  
月戊子遣許亢宗賀金國嗣位丁酉詔應係御筆斷罪

不許詣尚書省陳訴改正壬寅詔宗室后妃戚里宰執  
之家槩敷免夫錢甲辰置璣衡所八月乙卯譚稹落太  
尉罷宣撫使童貫落致仕領樞密院代之丁巳以溢機  
堡爲安羌城壬戌以復燕雲赦天下九月乙亥以白時  
中爲特進太宰兼門下侍郎李邦彥爲少宰兼中書侍  
郎蔡攸落節鉞辛巳大饗明堂丁亥以趙野爲尚書左  
丞翰林學士承旨宇文粹中爲尚書右丞開封尹蔡懋  
同知樞密院庚寅以金芝產于艮嶽萬壽峰改名壽岳

庚子金人遣富謨弼等以遺留物來獻冬十月庚午詔  
有收藏習用蘇黃之文者並令焚毀犯者以大不恭論  
癸酉詔內外官並以三年爲任治績著聞者再任永爲  
式十一月丙子王黼致仕太白晝見乙酉罷應奉司丙  
戌令尚書省置講議局壬辰詔監司擇縣令有治績者  
保奏召赴都堂審察錄用毋過三人十二月甲辰朔蔡  
京領講議司詔百官遵行元豐法制丁未詔內外侍從  
以上各舉所知二人癸亥蔡京落致仕領三省事是歲

河北山東盜起命內侍梁方平討之京師河東陝西地  
大震兩河京東西浙西水環慶邠寧涇原流徙令所在  
振恤夏國高麗于闐羅殿入貢

七年春正月癸酉朔詔赦兩河京西流民爲盜者仍給  
復一年癸巳詔罷諸路提舉常平官屬有罪當黜者以  
名聞仍令三省修已廢之法二月甲辰復置鑄錢監詔  
御史察贓吏己酉雨木冰庚戌詔京師運米五十萬斛  
至燕山令工部侍郎孟揆親往措置己巳進封廣國公

栻爲南康郡王福國公榛爲平陽郡王並開府儀同三  
司壬申京東轉運副使李孝昌言招安羣盜張萬仙等  
五萬餘人詔補官犒賜有差三月癸酉朔雨雹甲申知  
海州錢伯言奏招降山東寇賈進等十萬人詔補官有  
差丙戌以惠國公模爲開府儀同三司進封建安郡王  
夏四月丙辰降德音于京東河北路庚申蔡京復致仕  
復州縣免行錢戊辰詔行元豐官制復尚書令之名虛  
而勿授三公但爲階官母領三省事五月壬午封子樅

爲潤國公丁亥詔諸路帥臣舉將校有才略者監司舉  
守令有政績者歲各三人六月辛丑朔詔宗室復著姓  
丙午封童貫爲廣陽郡王戊申詔臣僚輒與內侍來往  
者論罪辛亥慮囚已未以蔡攸爲太保癸亥詔吏職雜  
流出身人母得陳請改換乙丑罷減六尚歲貢物秋七  
月庚午朔詔士庶母以天王君聖爲名字及以壬戌日  
輔臣焚香甲戌以河間郡王桺爲太保進封沂王是月  
河東義勝軍叛熙河河東路地震九月辛巳大饗明堂

壬辰金人以擒遼主遣李孝和等來告慶是月河東言  
尼堪至雲中詔童貫復宣撫有犧升御榻而坐冬十月  
辛亥賜曾布謚曰文肅戊午罷京畿和糴十一月庚午  
詔無出身待制以上年及三十通歷任滿十歲乃許任  
子乙亥遣使回慶金國甲申朝獻景靈宮乙酉饗太廟  
丙戌祀昊天上帝于圜丘赦天下庚寅以保靜軍節度  
使紳師道爲河東河北路制置使十二月乙巳童貫自  
太原遁歸京師己酉中山奏金人斡里雅布尼堪分兩道

入攻郭藥師以燕山叛北邊諸郡皆陷又陷忻代等州  
圍太原府太常少卿傅察奉使不屈死之丙辰罷浙江  
諸路花石綱延福宮西城租課及內外製造局金兵犯  
中山府詹度禦之戊午皇太子桓爲開封牧罷修蕃衍  
北宅令諸王子分居十位己未下詔罪己令中外直言  
極諫郡邑率師勤王募草澤異才有能出奇計及使疆  
外者罷道官罷大晟府行幸局西城及諸局所管緝錢  
盡付有司以保和殿大學士宇文虛中爲河北東路宣

諭使庚申詔內禪皇太子即皇帝位尊帝爲教主道君  
太上皇帝居于龍德宮尊皇后爲太上皇后靖康元年  
正月己巳詣亳州太清宮行恭謝禮遂幸鎮江府四月  
己亥還京師明年二月丁卯金人脅帝北行紹興五年  
四月甲子崩于五國城年五十有四七年九月甲子凶  
問至江南遙上尊謚曰聖文仁德顯孝皇帝廟號徽宗  
十二年八月乙酉梓宮還臨安十月丙寅權攢于永祐  
陵十二月丁卯祔太廟第十一室十二年正月己亥加

上尊號曰體神合道駿烈遜功聖文仁德憲慈顯孝皇帝

贊曰宋中葉之禍章蔡首惡趙良嗣厲階然哲宗之崩  
徽宗未立惇謂其輕佻不可以君天下遼天祚之亡張  
覺舉平州來歸良嗣以爲納之失信於金必啓外侮使  
二人之計行宋不立徽宗不納張覺金雖強何釁以伐  
宋哉以是知事變之來雖小人亦能知之而君子有所  
不能制也跡徽宗失國之由非若晉惠之愚孫皓之暴

亦非有曹馬之篡奪特恃其私知小慧用心一偏疎斥  
正士狎近姦諛於是蔡京以儇薄巧佞之資濟其騎奢  
淫佚之志溺信虛無崇飾遊觀困竭民力君臣逸豫相  
爲誕謾怠棄國政日行無稽及童貫用事又佳兵勤遠  
稔禍速亂他日國破身辱遂與石晉重貴同科豈得諉  
諸數哉昔西周新造之邦召公猶告武王以不作無益  
害有益不貴異物賤用物况宣政之爲宋承熙豐紹聖  
極喪之餘而徽宗又躬蹈二事之弊乎自古人君玩物

而喪志縱欲而敗度鮮不亡者徽宗甚焉故特著以爲戒

宋史卷二十二

宋史卷二十二考證

徽宗紀四宣和五年六月丙戌遼人張覺以平州來附

○臣蒲封按日知錄宋史胡廷與金約滅遼止求石

晉賂契丹故地而不思營平灤三州非晉賂乃劉仁

恭獻契丹以求援者既而王黼悔欲併得之遣趙良

嗣往請之再三金人不與此史家之誤考通鑑初幽

州北七百里有渝關下有渝水通海自關東北循海

有道道狹處纔數尺傍皆亂山高峻不可越北至牛

口舊置八防禦軍募土兵守之田租皆供軍食不入  
於薊幽州歲致繪纊以供戰士衣每歲旱穫清野堅  
壁以待契丹契丹至輒閉壁不戰俟其去選驍勇據  
隘擊之契丹常失利土兵皆自爲田園力戰有功則  
賜勲加賞由是契丹不敢輕入寇周德威爲盧龍節  
度使恃勇不修備遂失渝關之險契丹遂芻牧於營  
平之間又按遼史太祖天贊二年正月丙申大元帥  
堯骨克平州獲刺史趙思溫裨將張崇二月如平州

甲子以平州盧龍軍置節度使遼之天贊二年乃後  
唐莊宗同光元年是營平二州契丹自以兵力取之  
於唐而不於劉仁恭又非賂以求援也遼太祖以俘  
戶置瀋州當劉仁恭時尚未有此州尤爲無據遼史  
於瀋州下云石晉割地在平州之境亦誤也金史張  
覺傳平州自入契丹別爲一軍其明證矣從來考平  
瀋二州者多仍宋史之誤今特引日知錄於是條之  
下以正之

宋史卷二十二考證

欽定四庫全書會要卷五千六百五十一

史部

宋史卷二十三

元中書右丞相總裁托克托等修

本紀第二十三

欽宗

欽宗恭文順德仁孝皇帝諱桓徽宗皇帝長子母曰恭顯皇后王氏元符三年四月己酉生于坤寧殿初名亶封韓國公明年六月進封京兆郡王崇寧元年二月甲

午更名烜十一月丁亥又改今名大觀二年正月進封定王政和元年三月講學于資善堂三年正月加太保四年二月癸酉冠于文德殿五年二月乙巳立為皇太子太赦天下丁巳謁大廟詔乘金輶設鹵簿如至道天禧故事及宮僚參謁並稱臣皆辭之六年六月癸未納妃朱氏宣和七年十二月戊午除開封牧庚申徽宗詔皇太子嗣位自稱曰道君皇帝趣太子入禁中被以御服泣涕固辭因得疾又固辭不許辛酉即皇帝位御垂

拱殿見羣臣是日日有五色暉挾赤黃珥重日相蕩摩  
久之乃引道君皇帝出居龍德宮皇帝出居擷景園以  
少宰李邦彥為龍德宮使太保領樞密院事蔡攸門下  
侍郎吳敏副之是時金人已分道犯境壬戌赦大逆反  
叛以下罪進百官秩一等賞諸軍立妃朱氏為皇后以  
太子詹事耿南仲簽書樞密院事癸亥詔太傅燕王越  
王入朝不趨贊拜不名詔非三省樞密院所得旨有司  
勿行甲子斡里雅布陷信德府尼堪圍太原詔京東淮西

浙募兵入衛太學生陳東等上書數蔡京童貫王黼梁  
師成李彥朱勔罪謂之六賊請誅之丙寅上道君皇帝  
尊號曰教主道君太上皇帝皇后曰道君太上皇后詔  
改元

靖康元年春正月丁卯朔受羣臣朝賀退詣龍德宮賀  
道君皇帝詔中外臣庶實封言得失金人破相州戊辰  
破濱州威武軍節度使梁方平師潰河北河東路制置  
副使何灌退保滑州己巳灌奔還金人濟河詔親征道

君皇帝東巡以領樞密院事蔡攸為行宮使尚書左丞  
宇文粹中副之詔自今除授黜陟及恩數等事並參酌  
祖宗舊制罷內外官司局所一百五處止留後苑以奉  
龍德宮以門下侍郎吳敏知樞密院事吏部尚書李棁  
同知樞密院事貶太傅致仕王黼為崇信軍節度副使  
安置永州賜翊衛大夫安德軍承宣使李彥死並籍其  
家放寧遠軍節度使朱勔歸田里帝欲親征以李綱為  
留守以李棁為副給事中王寓諫親征罷之庚午道君

皇帝如亳州百姓多潛遁宰相欲奉帝出襄鄧李綱諫止之以綱為尚書右丞卒未以李綱為親征行營使侍衛親軍馬軍都指揮使曹暎副之太宰兼門下侍郎白時中罷李邦彥為太宰兼門下侍郎守中書侍郎張邦昌為少宰兼中書侍郎尚書左丞趙野為門下侍郎翰林學士承旨王孝迪為中書侍郎同知樞密院事蔡懋為尚書左丞壬申金人渡河遣使督諸道兵入援癸酉詔兩省樞密院官制一遵元豐故事金人犯京師命尚

書駕部員外郎鄭望之親衛大夫康州防禦使高世則  
使其軍詔從官舉文武臣僚堪充將帥有膽勇者是夜  
金人攻宣澤門李綱禦之斬獲百餘人至旦始退甲戌  
金人遣吳孝民來議和命李棁使金軍金人又使蕭三  
寶努耶律忠張愿恭來以吏部尚書唐恪同知樞密院  
事乙亥金人攻通津景陽等門李綱督戰自卯至酉斬  
首數千級何灌戰死李棁與蕭三寶努耶律忠王汭來  
索金帛數千萬且求割太原中山河間三鎮并宰相親

王為質乃退師丙子避正殿減常膳括借金銀藉倡優  
家財庚辰命張邦昌副康王構使金軍詔稱金國加大  
字辛巳道君皇帝幸鎮江以兵部尚書路允迪簽書樞  
密院事金人陷陽武知縣事蔣興祖死之壬午大風走  
石竟日乃止封子謙為太寧郡王甲申省廉訪使者官  
罷鈔旁定貼錢及諸州免行錢以諸路贍學戶絕田產  
歸常平司統制官馬忠以京西募兵至擊金人于順天  
門外敗之乙酉路允迪使尼堪軍于河東平陽府將劉

嗣初以城叛丁亥靖難軍節度使河北東路制置使  
种師道督涇原秦鳳兵入援以師道同知樞密院事為  
京畿河北河東宣撫使統四方勤王兵及前後軍庚寅  
盜殺王黼于雍丘癸巳大霧四塞乙未貶少保淮南節  
度使梁師成為彰化軍節度副使行及八角鎮賜死二  
月丁酉朔命都總制姚平仲將兵夜襲金人軍不克而  
奔戊戌罷李綱以謝金人廢親征行營司金人復來議  
和庚子命駙馬都尉曹晟使金軍辛丑又命資政殿大

學士字文虛中知東上閣門事王俅使之許割三鎮地  
太學諸生陳東等及都民數萬人伏闕上書請復用李  
綱及种師道且言李邦彥等疾綱恐其成功罷綱正墮  
金人之計會邦彥入朝衆數其罪而罵吳敏傳宣衆不  
退遂撾登聞鼓山呼動地殿帥王宗濋恐生變奏上勉  
從之遣耿南仲號於衆曰已得旨宣綱矣內侍朱拱之  
宣綱後期衆讐而磔之并殺內侍數十人乃復綱右丞  
充京城防禦使壬寅追封范仲淹魏國公贈司馬光太

師張商英太保除元祐黨籍學術之禁詔誅士民殺內侍為首者禁伏闕上書廢苑囿宮觀可以與民者金人使王汭來癸卯命肅王樞使金軍以觀文殿學士大名尹徐處仁為中書侍郎字文虛中簽書樞密院事蔡懋罷乙巳字文虛中王俅復使金軍康王至自金軍金人遣韓光裔來告辭遂退師京師解嚴丙午康王構為太傅靜江奉寧軍節度使省明堂班朔布政官丁未日有兩珥戊申赦天下詔諭士民自今庶事並遵用祖宗舊

制凡蠹國害民之事一切寢罷己酉罷宰執兼神霄玉  
清萬壽宮使及殿中監符寶郎詔用祖宗故事擇武臣  
得軍心者為同知簽書樞密院邊將有威望者為三衙  
以金人請和詔官民昔嘗附金而復歸本朝者各還其  
鄉國庚戌李邦彥罷以張邦昌為太宰兼門下侍郎吳  
敏為少宰兼中書侍郎李綱知樞密院事耿南仲為尚  
書左丞李稅為尚書右丞辛亥詔監察御史言事如祖  
宗法宇文粹中罷知江寧府癸丑种師道罷為中太一

宮使贈右正言陳瓘為右諫議大夫甲寅貶太師致仕  
蔡京為祕書監分司南京太師廣陽郡王童貫為左衛  
上將軍太保領樞密院事蔡攸為太中大夫提舉亳州  
明道宮先是尼堪遣人來求賂大臣以勤王兵大集拘  
其使人且納約伊都以圖之至是尼堪怒及攻太原不  
克分兵趣京師過南北關權威勝軍李植以城降乙卯  
陷隆德府知府張確通判趙伯臻司錄張彥遹死之丙  
辰有二流星一出張宿入濁沒一出北河入軫已未詔

遙郡承宣使有功應除正任者自今除正任刺史辛酉  
梁方平坐棄河津伏誅王孝迪罷命給事中王雲侍衛  
親軍馬軍都指揮使曹暎使金國鎮洮軍節度使中太  
乙宮使种師道為河南河東路宣諭使保靜軍節度使  
前副都指揮使姚古為制置使乙丑御殿復膳丙寅下  
哀痛之詔于陝西河東是月金人犯澤州之高平知州  
高世由往犒之乃去三月丁卯朔遣徽猷閣待制宋煥  
奉表道君皇帝行宮詔侍從言事詔非三省樞密院所

奉旨諸司不許奉行罷川路歲所遣使募人掩軍民遺骸遣使分就四郊致祭戊辰李稅罷為鴻慶宮使己巳張邦昌罷為中太一宮使徐處仁為太宰兼門下侍郎唐恪為中書侍郎翰林學士何㮚為尚書右丞御史中丞許翰同知樞密院事庚午宇文虛中罷知青州癸酉詣景靈東宮行恭謝禮命趙野為道君皇帝行宮奉迎使甲戌恭謝景靈西宮及建隆觀乙亥詣陽德觀凝祥池中太乙宮佑神觀相國寺丙子改擷景園為寧德宮

錄司馬光後己卯燕王僕越王偲為太師壬午詔金人叛盟深入其元主和議李邦彥奉使許地李稅李鄴鄭望之悉行罷黜又詔种師道姚古种師中往援三鎮保塞陵寢所在誓當固守癸未遣李綱迎道君皇帝于南京以徐處仁為禮儀使殿中侍御史李擢左司諫李會罷乙酉迎道君皇帝于宜春苑太后入居寧德宮丙戌知中山府詹度為資政殿大學士知太原府張孝純知河間府陳遘並為資政殿學士知澤州高世由直龍圖

閣賞城守之勞也丁亥朝于寧德宮詔扈從行宮官吏  
候還京日優加賞典除有罪之人迫於公議已行遣外  
餘令臺諫勿復用前事糾言庚寅肅王樞為太傅姚古  
復隆德府辛卯復威勝軍壬辰太保景王杞濟王栩為  
太傅有流星出紫微垣甲午康王構為集慶建雄軍節  
度使尚書戶部侍郎錢蓋為陝西制置使命陳東初品  
官賜同進士出身辭不拜籍朱勔家乙未詔金歸朝官  
民未發遣者止之丙申貶蔡京為崇信軍節度副使是

春夏人取天德雲內武州及河東八館夏四月戊戌夏人陷鎮威城攝知城事朱昭死之己亥迎太上皇帝入都門壬寅朝于龍德宮癸卯立子謙為皇太子耿南仲為門下侍郎乙巳置春秋博士戊申置詳議司於尚書省討論祖宗法己酉乾龍節羣臣上壽于紫宸殿庚戌趙野罷壬子金人使賈寗左企弓來癸丑封太師沂國公鄭紳為樂平郡王貶童貫為昭化軍節度副使安置郴州減宰執俸給三之一及支賜之半詔開經筵令吏

部稽考庶官凡由楊戩李彥之公田王黼朱勔之應奉  
童貫西北之師孟昌齡河防之役夔蜀湖南之開疆闢  
陝河東之改幣及近習所引獻頌可采特赴殿試之流  
所得爵賞悉奪之甲寅种師道加太尉同知樞密院事  
河北河東路宣撫使乙卯詔自今假日特坐百司毋得  
休務以平涼軍節度使范訥為右金吾衛上將軍丙辰  
詔有告姦人妄言金人復至以恐動居民者賞之戊午  
進封南康郡王栻為和王平陽郡王榛為信王己未復

以詩賦取士禁用莊老及王安石字說壬戌詔親擢臺諫官宰執勿得薦舉著為令追政和以來道官處士先生封贈奏補等勅書甲子令在京監察御史在外監司郡守及路分銓轄已上舉曾經邊任或有武勇可以統衆出戰者人二員東兵正將占沆與金人戰于交城縣死之乙丑詔三衙并諸路帥司各舉諳練邊事智勇過人并豪俊奇傑衆所推服堪充統制將領者各五名貶蔡攸節度副使安置朱勔于循州五月丙寅朔朝于龍

德宮令提舉官日具太上皇帝起居平安以聞丁卯詔  
天下有能以財穀佐軍者有司以名聞推恩有差以少  
傅鎮西軍節度余深為特進觀文殿大學士戊辰罷王  
安石配享孔子廟庭庚午少傅安武軍節度使錢景臻  
鎮安軍節度使開府儀同三司劉宗元並為左金吾衛  
上將軍保信軍節度使劉敷武成軍節度使劉敏嚮德  
軍節度使張琳岳陽軍節度使王舜臣應道軍節度使  
朱孝孫瀘川軍節度使錢忱並為右金吾衛上將軍是

日寒辛未申錮禁詔無出身待制已上年及三十而通  
歷任實及十年者乃得任子監察御史余應求坐言事  
迎合大臣罷知衛州甲戌曲赦河北路乙亥申銷金禁  
丁丑詔以儉約先天下澄冗汰貪為民除害授監司郡  
縣奉行所未及者凡十有六事姚古將兵至威勝聞尼  
堪將至衆驚潰河東大震河北河東路制置副使种師  
中與金人戰于榆次死之己卯借外任官職田一年開  
府儀同三司高俅卒辛巳損太官日進膳追削高俅官

甲申罷詳議司已丑以河東經畧安撫使張孝純為檢  
校少保武當軍節度使壬辰詔天下舉習武藝兵書者  
乙未詔姚古援太原六月丙申朔以道君皇帝還朝御  
紫宸殿受羣臣朝賀詔諫官極論闕失戊戌令中外舉  
文武官才堪將帥者時太原圍急羣臣欲割三鎮地李  
納沮之乃以李納代种師道為宣撫使援太原辛丑以  
資政殿學士劉韜為宣撫副使陝西制置司都統制解  
潛為制置副使太白犯歲星壬寅封鄆國公程為安康

郡王韓國公捷為廣平郡王并開府儀同三司詔今日

政令惟遵奉上皇詔書修復祖宗故事羣臣庶士亦當  
講孔孟之正道察安石舊說之不當者羽翼朕志以濟  
中興癸卯以侍衛親軍馬軍副都指揮使鎮西軍承宣  
使王稟為建武軍節度使錄堅守太原之功也甲辰路  
允迪罷為醴泉觀使乙巳左司諫陳公輔以言事責監  
合州酒務壬子天狗墜地有聲如雷癸丑慮囚丙辰太  
白熒惑歲鎮四星合於張辛酉罷都水將作監承授內

侍官熙河都統制焦安節坐不法李綱斬之壬戌姚古  
坐擁兵逗遛貶為節度副使安置廣州尋出紫微垣秋  
七月乙丑朔除元符上書邪等之禁宋昭政和中上書  
諫攻遼貶連州庚午詔赴都堂乙亥安置蔡京于儋州  
攸雷州童貫吉陽軍己卯免借河北東陝西路職田  
乙酉詔蔡京子孫二十三人已分竄遠地遇赦不許量  
移是日京死于潭州丁亥令侍從官共議改修宣仁聖  
烈皇后謗史辛卯遣監察御史張澂誅童貫廣西轉運

副使李昇之誅趙良嗣並竄其子孫于海南壬辰侍御  
史李光遠坐言事貶監當是月解潛與金人戰于南關  
敗績劉韜自遼州引兵與金人戰敗績八月甲午朔錄  
陳瓘後丙申復命种師道以宣撫使巡邊召李綱還庚  
子詔以彗星避殿減膳令從臣具民間疾苦以聞河東  
察訪使張灝與金人戰于文水敗績辛丑詔求民之疾  
苦者十七事悉除之丁未斡里雅布又攻廣信軍保州不  
克遂犯真定戊申都統制張思正等夜襲金人于文水

縣敗之已酉復戰師潰死者數萬人思正奔汾州都統  
制折可求師潰于子夏山威勝隆德汾晉澤絳民皆渡  
河南奔州縣皆空金人乘勝攻太原錄張庭堅後乙卯  
遣徽猷閣待制王雲閣門宣贊舍人馬識遠使于金國  
秘書著作佐郎劉岑太常博士李若水分使其軍議和  
戊午許翰罷知亳州己未太宰徐處仁罷知東平少宰  
吳敏罷知揚州以唐恪為少宰兼中書侍郎何㮚為中  
書侍郎禮部尚書陳過庭為尚書右丞開封尹聶昌同

知樞密院事御史中丞李回簽書樞密院事庚申遣王雲使金軍許以三鎮賦稅是月福州軍亂殺其知州事柳庭俊九月丙寅金人陷太原執安撫使張孝純副都總管王稟通判方筭皆死之辛未貶吳敏為崇信軍節度副使安置涪州移蔡攸于萬安軍尋與弟脩及朱勔皆賜死乙亥詔編修勅令所取靖康以前蔡京所乞御筆手詔參祖宗法及今所行者刪修成書丁丑禮部尚書王寓為尚書左丞戊寅有赤氣隨日出李綱罷知揚

州壬午梟童貫首于都市癸未賜布衣尹焞為和靖處士甲申日有兩珥背氣丙戌建三京及鄧州為都總管府分總四道兵庚寅以知大名府趙野為北道都總管知河南府王襄為西道都總管知鄧州張叔夜為南道都總管知應天府胡直孺為東道都總管又罷李綱提舉洞霄宮辛卯遣給事中黃鏗由海道使金國議和是月夏人陷西安州冬十月癸巳朔御殿復膳貶李綱為保靜軍節度副使安置建昌軍丁酉金人陷真定都鈐

轄劉鷗死之有流星如杯戊戌金人使楊天吉王汭來  
庚子日有青赤黃戴氣金人陷汾州知州張克載兵馬  
都監賈亶死之又攻平定軍辛丑下哀痛詔命河北河  
東都路帥臣傳檄所部得便宜行事壬寅天寧節率羣  
臣詣龍德宮上壽甲辰詔用蔡京王黼童貫所薦人丙  
午集從官于尚書省議割三鎮召种師道還丁未以禮  
部尚書馮澥知樞密院事己酉閱砲飛山營庚戌以范  
訥為寧武軍節度使河北東路宣撫使遼故將小鞠

隸攻陷麟州建寧砦知砦楊震死之壬子詔太常禮官  
集議金主尊號命尚書左丞王寓副康王使斡羅布軍  
寓辭乙卯雨木冰丙辰金人陷平陽府又陷威勝隆德  
澤州丁巳高麗入貢令明州遞表以進遣其使還戊午  
貶王寓為單州團練副使命馮澥代行庚申日有兩珥  
及背氣侍御史胡舜陟請援中山不省辛酉种師道薨  
十一月丙寅夏人陷懷德軍知軍事劉銓通判杜翊世  
死之籍譚稹家戊辰康王未至金軍而還馮澥罷己巳

集百官議三鎮棄守庚午詔河北河東京畿清野令流  
民得占官舍寺觀以居辛未有流星如杯壬申禁京師  
民以浮言相動者癸酉右諫議大夫范宗尹以首議棄  
地罷金人至河外宣撫副使折彥質領師十二萬拒之  
甲戌師潰金人濟河知河陽燕瑛西京留守王襄棄城  
遁乙亥命刑部尚書王雲副康王使斡離不軍許割三  
鎮奉袞冕車輅尊其主為皇叔且上尊號丙子金人度  
河折彥質兵盡潰提刑許高兵潰于洛口金人來言欲

盡得河北地京師戒嚴遣資政殿學士馮澥及李若水  
使尼堪軍丁丑何㮚罷以尚書左丞陳過庭為尚書侍  
郎兵部尚書孫傅為尚書右丞命成忠郎郭京領選六  
甲正兵所簽書樞密院事李回以萬騎防河衆潰而歸  
是日塞京城門戊寅進龍德宮婉容韋氏為賢妃康王  
構為安國安武軍節度使罷清野辛巳以知懷州霍安  
國為徽猷閣待制通判林淵直徽猷閣賞守禦之功也  
壬午斡里雅布使楊天吉王汭貝勒

來命耿南仲

使幹里雅布軍聶昌使尼堪軍許畫河為界康王至磁州  
州人殺王雲止王勿行王復還相州甲申以尚書右丞  
孫傅同知樞密院事御史中丞曹輔簽書樞密院事以  
京兆府路安撫使范致虛為陝西五路宣撫使令督勤  
王兵入援乙酉幹里雅布軍至城下遣蠟書間行出關召  
兵又約康王及河北守將來援多為邏兵所獲丁亥大  
風發屋折木李回罷戊子金人攻通津門范瓊出兵焚  
其砦己丑南道總管張叔夜將兵勤王至玉津園以叔

夜為延康殿學士幹里雅布遣劉晏來庾寅幸東壁勞軍  
詔三省長官名悉依元豐舊制領開封府何稟為門下  
侍郎閏月壬辰朔金人攻善利門統制姚仲友禦之竒  
兵作亂殺使臣王宗濋斬數十人乃定唐恪出都人欲  
擊之因求去罷為中太一宮使以門下侍郎何稟為尚  
書左僕射兼中書侍郎劉韜坐棄軍降五官予祠癸巳  
京師苦寒用日者言借土牛迎春朱伯友坐棄鄭州降  
三官罷西道總管王襄棄西京去知澤州高世由以城

降于金燕瑛欲棄河陽為亂兵所殺河東諸郡或降或破殆盡都民殺東壁統制官辛亢宗罷民乘城代以保甲尼堪軍至城下甲午時雨雪交作帝被甲登城以御膳賜士卒易火飯以進人皆感激流涕金人攻通津門數百人縋城禦之焚其砲架五鶩車二驛召李綱為資政殿大學士領開封府金人陷懷州霍安國林淵及其鉢轄張彭年都監趙士諱張謙皆死之乙未金人入青城攻朝陽門馮澥與金人蕭慶楊真誥來丙申帝幸宣

化門以障泥乘馬行泥淖中民皆感泣張叔夜數戰有  
功帝如安上門召見拜資政殿學士金人執胡直孺又  
陷拱州丁酉赤氣亘天以馮澥為尚書左丞戊戌殿前  
副都指揮使王宗濋與金人戰于城下統制官高師旦  
死之庚子以資政殿學士張叔夜簽書樞密院事金人  
攻宣化門姚仲友禦之辛丑金人攻南壁殺傷相當壬  
寅詔河北守臣盡起軍民兵倍道入援癸卯金人攻南  
壁張叔夜范瓊分兵襲之遙見金兵奔還自相蹈藉溺

隍死者以千數甲辰大雨雪金人陷亳州遣間使召諸道兵勤王乙巳大寒士卒噤戰不能執兵有僵仆者帝在禁中徒跣祈晴時勤王兵不至城中兵可用者惟衛士三萬然亦十失五六金人攻城急丙午雨木冰丁未始避正殿己酉遣馮澥曹輔與宗室仲溫士諦使金軍請和命康王為天下兵馬大元帥速領兵入衛辛亥金人來議和要親王出盟壬子金人攻通津宣化門范瓊以千人出戰渡河氷裂沒者五百餘人自是士氣益挫

甲寅大風自北起俄大雨雪連日夜不止乙卯金人復使劉晏來趣親王宰相出盟丙辰妖人郭京用六甲法盡令守禦人下城大啓宣化門出攻金人兵大敗京託言下城作法引餘兵遁去金兵登城衆皆披靡金人焚南薰諸門姚仲友死于亂兵宦者黃經自赴火死統制官何慶言陳克禮中書舍人高振力戰與其家人皆被害秦元領保甲斬關遁京城陷衛士入都亭驛執劉晏殺之丁巳奉道君皇帝寧德皇后入居延福宮命何㮚

及濟王相使金軍戊午何稟入言金人邀上皇出郊帝曰上皇驚憂而疾必欲之出朕當親往自己卯雪不止是日霽夜有白氣出太微彗星見庚申日赤如火無光辛酉帝如青城十二月壬戌朔帝在青城蕭慶入居尚書省是日康王開大元帥府于相州癸亥帝至自青城甲子大索金帛丙寅遣陳過庭劉韜使兩河割地辛未定京師米價勸糴以振民癸酉斬行門指揮使蔣宣李福乙未康王如北京丙子尚書省火庚辰雨雹癸未大

雪寒縱民伐紫筠館花木為薪庚寅康王如東平

二年春正月辛卯朔命濟王栩景王杞出賀金軍金人亦遣使入賀壬辰金人趣召康王還遣聶昌耿南仲陳過庭出割兩河地民堅守不奉詔凡累月止得石州甲午詔兩河民開門出降乙未有大星出建星西南流入于濁沒丁酉雨木冰已亥陰曠風迅發夜西北陰雲中  
有如火光庚子金人索金銀急何㮚李若水勸帝親至軍中從之以太子監國而行乙巳籍梁師成家丙午劉

韜自經于金軍太學生徐揆上書乞守門請帝還闕金人取至軍中揆抗論為所殺至夜金人劫神衛營丁未大霧四塞金人下舍輝門剽掠焚五岳觀二月辛酉朔帝在青城自如金軍都人出迎駕丙寅金人慙南薰門路人心大恐已而金人令推立異姓孫傅方號慟乞立趙氏不允丁卯金人要上皇如青城以內侍鄧述所具諸王孫名盡取入軍中卒未金人逼上皇召皇后皇太子入青城庚辰康王如濟州癸未觀文殿大學士唐恪

仰藥自殺乙酉金人以括金未足殺戶部尚書梅執禮  
侍郎陳知質刑部侍郎程振給事中安扶三月辛卯朔  
帝在青城丁酉金人立張邦昌為楚帝庚子金人來取  
宗室開封尹徐秉哲令民結保母藏匿丁巳金人脅上  
皇北行夏四月庚申朔大風吹石折木金人以帝及皇  
后皇太子北歸凡法駕鹵簿皇后以下車輶鹵簿冠服  
禮器法物大樂教坊樂器祭器八寶九鼎圭璧渾天儀  
銅人刻漏古器景靈宮供器太清樓秘閣三館書天下

州府圖及官吏內人內侍技藝工匠優府庫畜積為  
之一空辛酉北風大起苦寒五月庚寅朔康王即位于  
南京遼上尊號曰孝慈淵聖皇帝紹興三十一年五月  
辛卯帝崩問至七月己丑上尊謚曰恭文順德仁孝皇  
帝廟號欽宗三十二年閏二月戊寅祔于太廟

贊曰帝在東宮不見失德及其踐阼聲技音樂一無所  
好靖康初政能正王黼朱勔等罪而竄殛之故金人聞  
帝內禪將有卷甲北旆之意矣惜其亂勢已成不可救

藥君臣相視又不能同力協謀以濟斯難懦懦然講和之不暇卒致父子淪胥社稷蕪茀帝至於是蓋亦異懦而不知義者歟享國日淺而受禍至深考其所自真可悼也夫真可悼也夫

宋史卷二十三

欽定四庫全書會要卷五千六百五十二

史部

宋史卷二十四

元中書右丞相總裁托克托等修

本紀第二十四

高宗一

高宗受命中興全功至德聖神武文昭仁憲孝皇帝諱構字德基徽宗第九子母曰顯仁皇后韋氏大觀元年五月乙巳生東京之大內赤光照室八月丁丑賜名授

定武軍節度使檢校太尉封蜀國公二年正月庚申封廣平郡王宣和三年十二月壬子進封康王資性朗悟博學彊記讀書日誦千餘言挽弓至一石五斗宣和四年始冠出就外第靖康元年春正月金人犯京師軍于城西北遣使入城邀親王宰臣議和軍中朝廷方遣同知樞密院事李棁等使金議割太原中山河間三鎮遣宰臣授地親王送大軍過河欽宗召帝諭指帝慷慨請行遂命少宰張邦昌為計議使與帝俱金帥斡里雅布留

之軍中旬日帝意氣閒暇二月會京畿宣撫司都統制  
姚平仲夜襲金人砦不克金人見責邦昌恐懼涕泣帝  
不為動幹里雅布異之更請肅王癸卯肅王至軍中許割  
三鎮地進邦昌為太宰留質軍中帝始得還金兵退復  
遣給事中王雲使金以租賦贖三鎮地又以蠟書結遼  
降將耶律伊都為金人所得八月金帥尼堪復引兵深  
入陷太原幹里雅布破真定冬十月王雲從吏自金先還  
言金人須帝再至乃議和雲歸言金人堅欲得地不然

進兵取汴都十一月詔帝使河北奉袞冕玉輶尊金主  
為伯上尊號十八字被命即發京師以門下侍郎耿南  
仲主和議請與俱乃以其子中書舍人延禧為參議官  
偕行帝由滑濬至磁州守臣宗澤請曰肅王去不返金  
兵已迫復去何益請留磁磁人以雲將挾帝入金遂殺  
雲時尼堪幹里雅布已率兵渡河相繼圍京師從者以磁  
不可留知相州汪伯彥亦以蠟書請帝還相州閏月耿  
南仲馳至相見帝致辭以面受欽宗之旨盡起河北兵

入衛帝乃同南仲募兵勤王初朝廷聞金兵渡河欲拜  
帝為元帥至是殿中侍御史胡唐老復申元帥之議尚  
書右僕射何㮚擬詔書以進欽宗遣閻門祗候秦仔持  
蠟詔至相拜帝為河北兵馬大元帥知中山府陳亨伯  
為元帥汪伯彥宗澤為副元帥仔於頂髮中出詔帝讀  
之嗚咽兵民感動十二月壬戌朔帝開大元帥府有兵  
萬人分為五軍命武顯大夫陳淬都統制軍馬閻門祗  
候侯章齋蠟書至自京師詔帝盡發河北兵命守臣自

將帝乃下令諸郡守與諸將議引兵渡河乙亥帝率兵離相州丙子履冰渡河丁丑次大名府宗澤以二千人先諸軍至知信德府梁揚祖以三千人繼至張俊苗傅楊沂中田師中皆在麾下兵威稍振會簽書樞密院事曹輔齋蠟詔至云金人登城不下方議和好可屯兵近甸母輕動汪伯彥等皆信和議惟宗澤請直趨澶淵為壁次第解京師之圍伯彥南仲請移軍東平帝遂遣澤以萬人進屯澶淵揚言帝在軍中自是澤不復預府中

謀議帝決意趨東平庚寅帝發大名

建炎元年春正月癸巳帝至東平初帝軍在相州京城  
圍久中外莫知帝處及是陳請四集取決帥府壬寅高  
陽關路安撫使黃潛善總管楊惟忠亦部兵數千至東  
平命潛善進屯興仁留惟忠為元帥都統制金人聞帝  
在澶淵遣甲士及中書舍人張澂來召宗澤命壯士射  
之澂乃遁伯彥等請帝如濟州二月庚辰發東平癸未  
次濟州時帥府官軍及羣盜來歸者號百萬人分屯濟

漢諸州府而諸路勤王兵不得進二帝已在金人軍中  
三月丁酉金人立張邦昌為帝稱大楚黃潛善以告帝  
慟哭僚屬欲奉帝駐軍宿州謀渡江左帝聞三軍籍籍  
遂輒承制以宗澤為徽猷閣待制丁巳幹里雅布退師徽  
宗北遷戊午承制以汪彥伯為顯謨閣待制充元帥潛  
善為徽猷閣待制充副元帥夏四月尼堪退師欽宗北  
遷癸亥邦昌尊元祐皇后為宋太后遣人至濟州訪帝  
又遣吏部尚書謝克家來迎耿南仲率幕僚勸進帝避

席流涕遜辭不受伯彥等引天命人心為請且謂靖康  
紀元為十二月立康之兆帝曰當更思之以知淮寧府  
趙子崧為寶文閣學士元帥府參議官東南道總管統  
東南勤王兵邦昌遣閣門宣贊舍人蔣師愈等持書詣  
帝自言從權濟事及將歸寶避位之意帝亦貽諸帥書  
以未得至京已至者毋輒入聞資政殿大學士領開封  
府事李綱在湖北遣劉默持書訪之又諭宗澤等以受  
偽命之人義當誅討然慮事出權宜未可輕動澤復書

謂邦昌篡亂踪跡已無可疑宜早正天位興復社稷不可不斷門下侍郎呂好問亦以蠟書來言帝不自立恐有不當立而立者丁卯謝克家以大宋受命之寶至濟州帝慟哭跪受命克家還京師趣辦儀物戊辰濟州父老詣軍門言州四旁望見城中火光屬天請帝即位于濟會宗澤來言南京乃藝祖興王之地取四方中漕運尤易遂決意趨應天是夕邦昌手書上延福宮太后尊號曰元祐皇后入居禁中以尚書左丞馮澥為奉迎使

皇后又遣兄子衛尉少卿孟忠厚持手書遺帝皇后垂  
簾聽政邦昌權尚書左僕射率在京百官上表勸進不  
許甲戌皇后手書告中外俾帝嗣統乙亥百官再上表  
又不許丁丑馮澥等至濟州百官三上表許以權聽國  
事戊寅命宗澤先勒兵分駐長垣韋城等縣以備非常  
東道副總管朱勝非至濟州宣撫司統制官韓世忠以  
兵來會庚辰帝發濟州鄜延副總管劉光世自陝州來  
會以光世為五軍都提舉辛巳次單州壬午次虞城縣

西道都統管王襄自襄陽來會癸未至應天府皇后詔  
有司備法駕儀仗乙酉張邦昌至伏地慟哭請死帝慰  
撫之承制以汪伯彥為顯謨閣直學士黃潛善為徽猷  
閣直學士權吏部尚書王時雍等奉乘輿服御至羣臣  
勸進者益衆命有司築壇府門之左五月庚寅朔帝登  
壇受命禮畢慟哭遙謝二帝即位于府治改元建炎大  
赦常赦所不原者咸赦除之張邦昌及應于供奉金國  
之人一切不問命西京留守司修奉祖宗陵寢罷天下

神霄宮住散青苗錢應死節及歿于王事者並推恩奉  
使未還者祿其家一年應選人並循資已係承直郎者  
改次等京官臣僚因亂去官者限一月還任潰兵羣盜  
咸許自新免係官欠負蠲南京及元帥府常駐軍一月  
以上州縣夏稅應天府特奏名舉人並與同進士出身  
免解人與免省諸路特奏名三舉以上及宗室嘗預貢  
者並推恩應募兵勤王人以兵付州縣主兵官聽赴行  
在中外臣庶許言民間疾苦雖詆訐亦不加罪命官犯

罪更不取特旨裁斷蔡京童貫朱勔李彥孟昌齡梁師  
成譚稹及其子孫更不收斂內外大臣限十日各舉布  
衣有材畧者一人餘如故事以黃潛善為中書侍郎汪  
伯彥同知樞密院事元祐皇后在東京是日徹簾辛卯  
遙尊靖康皇帝為孝慈淵聖皇帝元祐皇后為元祐太  
后詔史官辨宣仁聖烈皇后誣謗築景靈宮于江寧府  
壬辰以張邦昌為太保奉國軍節度使同安郡王五日  
一赴都堂參決大事以河東北宣撫使范訥為京城留

守癸巳遙尊帝母韋賢妃為宣和皇后遙立嘉國夫人  
邢氏為皇后耿南仲罷甲午以李綱為尚書右僕射兼  
中書侍郎趣赴行在楊惟忠為建武軍節度使主管殿  
前司公事罷諸盜及民兵之為統制者簡其士馬隸五  
軍乙未以生辰為天申節馮澥罷以兵部尚書呂好問  
為尚書右丞命中軍統制馬忠後軍統制張渙率兵萬  
人趣河間府追襲金人丙申以呂好問兼門下侍郎丁  
酉以黃潛善兼御營使汪伯彥副之真定府路副總管

王淵為都統制鄜延路副總管劉光世提舉一行事務  
王時雍黃州安置命統制官薛廣張瓊率兵六千人會  
河北山水砦義兵共復磁州以資政殿學士路允  
迪為京城撫諭使龍圖閣學士耿延禧副之贈吏部侍  
郎李若水觀文殿學士謚忠愍己亥召太學生陳東赴  
行在李綱至江寧誅叛卒周德等庚子詔以靖康大臣  
主和誤國責李邦彥為建寧軍節度副使潯州安置徙  
吳敏柳州蔡懋英州李稅字文虛中鄭望之李鄴皆以

使金請割地責廣南諸州並安置卒丑詔張邦昌知幾  
達變勲在社稷如文彥博例月兩赴都堂壬寅封後宮  
潘氏為賢妃以江淮發運使梁揚祖提領東南茶鹽事  
癸卯天申節罷百官上壽乙巳賜諸路勤王兵還營者  
錢人三千丙午以誣謗宣仁聖烈皇后追貶蔡確蔡卞  
邢恕蔡懋官以保靜軍節度使姚古知河南府金人陷  
河中府權府事郝仲連死之丁未徽宗至燕山府庚戌  
以宗澤為龍圖閣學士知襄陽府壬子進張邦昌太傅

丙辰罷監察御史張所尋責江州安置丁巳詔成都京  
兆襄陽荆南江寧府鄧揚二州儲資糧修城壘以備巡  
幸以簽書樞密院事張叔夜嘗援京城力戰從徽宗北  
行遙命為觀文殿大學士醴泉觀使戊午右諫議大夫  
范宗尹罷遣太常少卿周望使河北軍前通問二帝西  
道總管王襄北道總管趙野坐勤王稽緩並分司襄陽  
府青州居住尋責襄永州野邵州並安置六月己未朔  
李綱入見上十議曰國是巡幸赦令僭逆偽命戰守本

政責成修德以前殿前副都指揮使王宗濋引衛兵遁逃致都城失守責官邵州安置徽猷閣直學士徐秉哲假資政殿學士為大金通問使秉哲辭庚申封靖康軍節度使仲湜嗣濮王尼堪還屯雲中辛酉命新任郎官未經上殿者並引對御史中丞顏岐罷徐秉哲責官梅州安置詔河北陝淮湖江浙州軍縣鎮募人修築城壁壬戌置登聞檢鼓院癸亥以黃潛善為門下侍郎兼權中書侍郎張邦昌坐僭逆責降招化軍節度副使潭

州安置及受僞命臣僚王時雍高州吳秆永州莫傳全  
州李擢柳州孫覲歸州並安置顏博文王紹以下論罪  
有差以知懷州霍安國河東宣撫使劉韜死節贈安國  
延康殿學士韜資政殿大學士甲子命李綱兼御營使  
乙丑以龍神衛四廂都指揮使馬忠為河北經制使措  
置民兵洪芻罷左諫議大夫下臺獄丁卯以祠部員外  
郎喻汝礪為四川撫諭督漕計羨緝及常平錢物罷開  
封諸州軍府司錄曹掾官州軍通判二員者省其一擢

減宰執奉賜三之一省諸路提舉常平司兩浙福建提  
舉市舶司賊李孝忠寇襄陽守臣黃叔教棄城遁立格  
買馬卒未以子勇士生大赦籍天下神霄宮錢穀充經費  
拘天下職田錢隸提刑司還元祐黨籍及上書人恩數  
癸酉詔陝西山東諸路帥臣團結軍民互相應援乙亥  
增諸縣弓手置武尉領之宗室叔向以所募勤王兵屯  
京師或言為變命劉光世捕誅之戊寅以汪伯彥知樞  
密院事遣宣義郎傅雱使河東軍前通問二帝已卯置

沿河沿淮沿江帥府十有九要都三十九次要都三十  
八帥守兼都總管守臣兼鈐轄都監總置軍九十六萬  
七千五百人別置水軍七十七將造舟江淮諸路置三  
省樞密院賞功司東京留守范訥落節鉞淄州居住庚  
辰以二帝未還禁州縣用樂辛已置沿河巡察六使壬  
午以戶部尚書張慤同知樞密院事兼提舉措置戶部  
財用癸未呂好問罷甲申併尚書戶部右曹所掌歸左  
曹命尚書總領乙酉以宗澤為東京留守杜充為北京

留守罷監司州郡職田丙戌詔陝西河北京東西路募  
兵合十萬人更番入衛行在命京東西路造戰車丁亥  
以張所為河北西路招撫使括買官民馬勸出財助國  
戊子以錢蓋為陝西經制使封趙懷恩為安化郡王因  
召五路兵赴行在秋七月己丑朔以樞密副都承旨王  
瓊為河東經制使庚寅詔王淵劉光世統制官張俊喬  
仲福韓世忠分討陳州軍賊杜用京東賊李昱及黎驛  
魚臺潰兵皆平之辛卯籍東南諸州神霄宮及贍學錢

助國用叙右監門衛大將軍貴州團練使士珸以磁洛  
義兵復洺州乙未以溫州觀察使范瓊為定武軍承宣  
使御營司同都統制丙申賜諸路彊壯巡社名為忠義  
巡社專隸安撫司戊戌欽宗至燕王府以忻州觀察使  
張渙為河北制置使東都宣武卒杜林謀據成都叛伏  
誅己亥詔臺省寺監繁簡相兼學官館職減舊制之半  
辛丑復議吳升莫傳等十一人罪並廣南江湖諸州安  
置餘遞貶有差壬寅詔奉元祐太后如東南六宮及衛

士家屬從行朕當獨留中原與金人決戰以延康殿學  
士許翰為尚書右丞甲辰以右諫議大夫宋齊愈當金  
人謀立異姓書張邦昌姓名斬于都市乙巳手詔京師  
未可往當巡幸東南丙午詔定議巡幸南陽以觀文殿  
學士范致虛知鄧州修城池繕宮室輸錢穀以實之丁  
未遣官詣京師迎奉太廟神主赴行在己酉罷四道都  
總管以尚書虞部員外郎張浚為殿中侍御史庚戌徵  
諸道兵期八日會行在丙辰徽宗自燕山密遣閭門宣

贊舍人曹勛至賜帝絹半臂書其領曰便可即真來援  
父母帝泣以示輔臣張所傳亮軍發行在是月關中賊  
史斌犯興州僭號稱帝八月戊午朔洪芻等坐圍城日  
括金銀自盜及私納宮人芻及余大均陳沖貸死流沙  
門島餘五人罪有差勝捷軍校陳通作亂于杭州執帥  
臣葉夢得殺漕臣吳昉己未元祐太后發京師庚申以  
劉光世為奉國軍節度使韓世忠張俊皆進一官辛酉  
右司諫潘良貴罷壬戌以李綱為尚書左僕射兼門下

侍郎黃潛善為右僕射兼中書侍郎張慤兼御營副使癸亥命御營使副大閱五軍庚午更號元祐太后為隆祐太后辛未罷傅亮經制副使召赴行在壬申召布衣譙定赴行在命御營統制辛道宗討陳通是夕東北方有赤氣癸酉以耿南仲主和誤國南雄州安置乙亥用張浚言罷李綱左僕射丙子隆祐太后發南京命侍衛馬軍都指揮使郭仲荀護衛如江寧兼節制江淮荆浙閩廣諸州制置東南盜賊丁丑以龍圖閣直學士錢伯

言知杭州節制兩浙淮東將兵及福建槍杖手討陳通  
庚辰降榜招諭杭州亂兵壬午用黃潛善議殺上書太  
學生陳東崇仁布衣歐陽澈乙酉遣兵部員外郎江端  
友等撫諭閩浙湖廣江淮京東西諸路及體訪官吏貪  
廉軍民利病許翰罷丁亥博州卒宮儀作亂犯萊州九  
月己丑建州軍校張員等作亂執守臣張勳轉運副使  
毛奎為所殺判官曹仔嬰城自守范瓊捕斬李孝忠于  
復州壬辰以金人犯河陽汜水軍詔擇日巡幸淮甸鑄

建炎通寶錢命淮浙沿海諸州增修城壁招訓民兵以備海道甲午命揚州守臣呂頤浩繕修城池宗澤往河北視師七月還是夜辛道宗兵潰于嘉興縣丁酉詔荆襄關陝江淮皆備巡幸戊戌罷買馬己亥以子萼為檢校少保集慶軍節度使封魏國公詔內外官司參用嘉祐元豐勅以俟新書庚子二帝徙居霄郡辛丑陳通劾提點刑獄周格營殺格執提點刑獄高士瞳壬寅遣徽猷閣待制孟忠厚迎奉太廟神主赴揚州以直秘閣王

主為招撫判官代張所尋責所廣南安置乙巳宗澤表請車駕還闕戊申河北招撫司都統制王彥渡河擊金人破之復新興縣己酉以諜報金人欲犯江浙詔暫駐淮甸捍禦稍定即還京闕募民入贊授官軍賊趙萬入常州執守臣何袞罷諸路經制招撫使庚戌始通當三大錢于淮浙荆湖諸路壬子命湖南撫諭官馬伸持詔賜張邦昌死于潭州併誅王時雍癸丑詔有敢妄議惑衆沮巡幸者許告而罪之不告者斬乙卯王彥及金人

戰敗績奔太行山聚衆其裨將岳飛引其部曲自為一軍趙萬陷鎮江府守臣趙子崧棄城渡江保瓜洲是秋金人分兵據兩河州縣惟中山慶源府保莫邢洺冀磁絳相州久之乃陷冬十月丁巳朔帝登舟幸淮甸戊午太后至揚州己未罷諸路勸誘獻納錢物庚申罷諸路召募潰兵忠義等人及寄居官擅集勤王兵者癸亥募羣盜能併滅賊衆者官之甲子以張浚論李綱不已落綱觀文殿大學士止奉宮祠知秀州兼權浙西提點刑

獄趙叔近入杭州招撫陳通乙丑罷帥府要郡次要郡及新軍水軍丁卯以王淵為杭州制置盜賊使統制官張俊從行庚午次泗州辛普照寺甲戌太白晝見己卯次楚州寶應縣後軍將孫琦等作亂逼左正言盧臣中墮水死庚辰命劉光世討鎮江叛兵辛巳以光世為滁和濠州江寧府界招捉盜賊制置使御營統制官苗傅為使司都統制朝請郎李械提舉廣西左右兩浙峒丁公事癸未至揚州禁內侍統兵官相見丙戌王淵張俊

誘趙萬等悉誅之十一月戊子李納鄂州居住真定軍  
賊張遇入池州守臣滕祐棄城遁己丑詔雜犯死罪有  
疑及情理可憫者撫諭官同提刑司酌情減降先斷後  
聞壬辰遣王倫等為金國通問使乙未以張慤為尚書  
左丞工部尚書顏岐同知樞密院事丙申曲赦應天府  
毫宿揚泗楚州高郵軍丙午以張慤為中書侍郎戊申  
以顏岐為尚書左丞兼權門下侍郎御史中丞許景衡  
為右丞刑部尚書郭三益同知樞密院事權密州趙野


棄城遁軍校杜彥據州追野殺之辛亥命福建路增招  
弓手金人陷河間府是月軍賊丁進圍壽春府守臣康  
允之拒却之十二月丙辰朔命從臣四員充講讀官就  
內殿講讀丁巳詔諸路提刑司選官即轉運司所在州  
類省試進士以待親策辛酉王淵入杭州執陳通等誅  
之壬戌青州敗將王定以兵作亂殺帥臣曾孝序癸亥  
尼堪犯汜水關西京留守孫昭遠遣將拒之戰歿昭遠  
引兵南遁尋命部將王仔奉啓運宮神御赴行在甲子

改授后父徽猷閣待制邢煥為光州觀察使乙丑詔凡  
刑賞大政並經三省其平請墨勅行下者罪之丙寅張  
遇犯江州戊辰金人圍棣州守臣姜綱之固守金兵解  
去甲戌金人陷同州守臣鄭驤死之張遇犯黃州己卯  
金人陷汝州入西京庚辰金人陷華州辛巳破潼關河  
東經制使王瓊自同州引兵遁入蜀丁進詣宗澤降乙  
酉增置廣西弓手以備邊以戶部尚書黃潛善為延康  
殿學士同提舉措置財用

宋史卷二十四

謹案卷二十一第六頁後三行太白晝見刊本白訛自今改

卷二十二第十八頁前七行況宣政之為宋句蓋指政和宣和而言考漢唐以來類舉一帝年號俱兩字全書自鄭榮稱開元天寶為開天而宋之熙寧元豐遂稱熙豐因有稱政和宣和為政宣者此云宣政則更為顛倒其文尤無義例但各本皆同姑仍而不改謹識其謬於此



總校官庶吉士臣張能照  
校對官檢討臣蕭九成

謄錄監生臣王元勛

謄錄舉人臣李駟